

MULLERES GALEGAS EN LOITA

POLOS NOSOS

DEREITOS



DENUNCIAMOS:

A uns gobernos que restrinxen e privatizan os servizos públicos (educación, sanidade, xustiza, servizos sociais), condenando aos sectores máis modestos e desprotexidos (entre os que as mulleres somos maioría) á pobreza.

A uns gobernos que acrecentan a desigualdade inherente a este sistema, tanto entre homes e mulleres coma entre persoas ricas e pobres. Conseguindo con isto que sexamos nós as que máis dificultades temos á hora de buscar emprego ou de traballar, atopándonos en situacions de precarización, contratos a tempo parcial ou discriminación salarial; ademais de vernos perpetuadas no rol de coidadoras, obligándonos deste xeito a recluírnos no fogar para poder así encargarnos de fillas, familiares enfermas e/ou traballo doméstico.

A uns gobernos abertamente machistas que permiten discursos que proclaman que “a maternidade é o que fai ás mulleres autenticamente mulleres” de Gallardón (actual Ministro de Xustiza) ou que “as leis son como as mulleres, están para violalas” de Castelao Bragaña. Gobernos que suprimen os organismos encargados da igualdade, que subvencionan a segregación por sexo no ensino, devolvéndonos a tempos pretéritos.

A uns gobernos que, elixidos para procurar o ben común, amparan e/ou practican a corrupción, pagando con cartos públicos débedas alleas, mentres fan unha política de defensa da igrexa, grandes empresas e bancos, que non teñen reparo en botarnos das nosas casas, forzándonos ao suicidio, á exclusión social, á pobreza e á miseria, ao roubarnos algo tan básico como o dereito a unha vivenda digna.

A uns gobernos que recortan en dereitos e liberdades nacionais, lingüísticas, sindicais, laborais, de prestación e amparo social, de expresión e manifestación e, especificamente, aquelas relativas á saúde sexual e reprodutiva das mulleres. Que queren dar un paso atrás de máis de 30 anos coa modificación da Lei do aborto, que pretende negarnos o dereito a decidir sobre os nosos propios corpos e as nosas propias vidas.

A uns gobernos que permiten a continuidade do feminicidio e os crimes de odio heteropatriarcais, que consenten e practican o fomento dos valores e modelos de comportamento reaccionarios e patróns de beleza enfermiza que fortalecen a tiranía estética.

A un sistema que nos agrede continuamente, que nos explota e nos fai escravas. Hoxe más ca nunca é preciso que combatamos cada recorte social, porque é un recorte ás nosas vidas. Polo tanto, as mulleres denunciamos todas as violencias que son exercidas contra nós. A violencia estrutural, a simbólica, a psicolóxica e a verbal.

Declarámonos en permanente rebeldía!



Nós, mulleres galegas en loita polos nosos dereitos, na nosa pluralidade, nos nosos diversos xeitos de ser muller e de existir, esiximos:

- Medidas concretas e recursos públicos en todos os ámbitos para erradicar a violencia machista (educativos, sanitarios, de información e de protección).
- Sanidade pública, universal (incluíndo a todas as persoas, tamén ás persoas sen papeis) e de calidade, con atención especializada á saúde das mulleres. Non ao peche dos COF nin á demora da atención xinecolóxica.
- Mantemento, como mínimo, da actual Lei de Saude Sexual e Reprodutiva que inclúe o dereito das mulleres á interrupción do seu embarazo na sanidade pública.
- Ensino público, coeducativo, non sexista, laico, de calidade e en galego. Paralización do proxecto da Lei Wert.
- Dereito a unha vivenda digna. Paralización dos desafiuamentos. Fomento do aluguer social.
- Emprego de calidade e salarios dignos para todas as persoas, con igualdade salarial entre mulleres e homes. Eliminación da temporalidade, a precariedade dos traballoos feminizados e a sobreexplotación das mulleres.
- Prestacións sociais e pensións dignas. Estabelecer medidas de acción positiva para evitar as desigualdades no acceso e na contía das pensións, derivadas de situacíons de discriminación. É dicir, esiximos a Renda Básica das Iguais.
- Equiparación dos dereitos laborais das empregadas do fogar (400.000 seguen sen estar dadas de alta na S.Social); das traballadoras do sexo e das traballadoras migrantes.
- Medidas que faciliten a regularización das persoas migrantes residentes e que garantan a plena igualdade de dereitos co conxunto da poboación galega.
- Aplicación da Lei de Titularidade Compartida nas explotacións agrarias.
- Unha política laboral, agraria, alimentaria, fiscal e social en función das necesidades da cidadanía e ao servizo dunha redistribución máis xusta dos recursos, que estableza medidas de acción positiva para poñer fin á discriminación das mulleres e que poña freo á emigración da mocidade galega.
- Servizos sociais públicos, universais e de calidade que dean cobertura ás necesidades de coidado de familiares e persoas a cargo.
- Medidas que garantan compatibilizar a vida persoal, familiar e laboral.
- Medidas que garantan unha vida sen limitacións nin barreiras para as persoas con diversidade funcional.
- Respecto aos nosos dereitos sexuais e reprodutivos, ao control dos nosos corpos e a decidir libremente sobre a nosa maternidade, establecendo desde os poderes públicos as condicións para poder facelo con todas as garantías.
- Unha vida sen violencias, en plenitude de dereitos, con independencia da orientación sexual e identidade sexual e de xénero.

A igualdade é un ben de primeira necesidade!

Viva a loita das mulleres!

Viva a loita feminista!

**sábado 9 de marzo, ás12.30
estación do tren
compostela**



ASINAN:

Adiante, AMI, Andaina, Anova-IN, Area da Muller de Esquerda Unida, Asamblea Aberta de Compostela, Asemblea de Mulleres Aguiñoar, Asemblea de mulleres do Condado, Asemblea de Mulleres do STEG, BNG, Briga, Central Unitaria de Traballadoras, Feminismos Compostela, Foro Galego de Inmigración, Fpg, Isca!, Marcha Mundial das Mulleres, Nós mesmas, NÓS-Unidade Popular, Observatorio Feminista de Saúde da Coruña, Rede Feminista Galega, Secretaría da Muller da CIG, Secretaría das Mulleres do Sindicato Labrego Galego